

JONÁS

Jawen unanmati janchaki

Asiria nawabu nortekidi jiwebaunxun Israelin enabu xuku betsa jiwebaunabu jatu achidiabuma ja año 783tian kasmai Cristo judiamatian jau jawen kupitikidi jatuki chanitanun Jehován Jonás katua jawen jancha chibankin Israelin enabu xanen ibujaida Jeroboam inun jawenabu Jonásin Jehová yuixunkubainikiaki. (2 Reyes 14.23-25) Jakia Asiria nawabu xanen ibujaidatun maewan Nínive anu Jehován Jonás yunua jadi jatu bechিপaiamajaida jawa kakatsi ikama badi kaikidi chaijaida anu paxai kai Jehován nemanikiaki. Jaskakainkin ma kanea Jonásin tapintan jaska Jehován yunuima Nínive anu Jonás damapaikaini kanikiaki. Jehován yunuti jancha danankin nun jawa axuanmadi Jehován nuku unanmakin tapinmatidu na miyuiwen uinkin nukundi nun unantidubuki.

Nínive anu Jehován Jonás nichinkin yununikiaki, na janchadan

1 ¹ Amitain juni bake Jonás Jehován yunukin yuikin: ² “Benitan Asiria nawabun maewan ewapajaida Nínive anu katanwen. Chakabujaidakubainaibu en uiainwen taexun chakabuwakin en jatu yamawaxanai jatu banabimatanwen”, aka

³ jawen yunua jancha ninkakin chibankatsi ikama Jehová anua paxai Tarsis anu kanun ika ianenwan ewapa kexa anu bai butua mae jawen kena Jope anu Jonás ka xaxu ewapa Tarsiskidi kai bechitushitan jawen paxai kanun ixun peiwen pakatan Jehová ninkama patapakaini chaijaida Tarsis anu kanun ika xaxu ewapa medan inatan ma kaya ⁴ jakia niwe kushipajaida Jehován yunua bekin ianenwan bechuduwanbidankin jene buspu tsaubidankin xaxu ewapa jaxka jaxka akaitun besuaya ⁵ jabu xaxu bunikabu datejaidakin jatun mekenika yushin tibibun jau jatu medabewanunbun yukakin januxun xaxu xankawakin mabu ichapa buaibu ianenwan medan udenkin puku keyuaibun jabiatandi xaxu uke medan janu mabu aduti anu jikikain Jonás uxa chakayama dakaken ⁶ januxun xaxu bunikabun xanen ibu Jonás anu kaxun bestenwanta yuikin:

—¿Miadan, jaskai min janu jua dakamen, uxabuun? Benitan jau nuku medabewakin mekenun min mekenika yushin nuku yukaxunwen. Nukuwen nuitidumenkain, nun jasayamanunan— aka

7jabiatandi xaxu bunikabu yuinamei:

—Tsua chakabukidani juawen taexun nuku akimenkain. Jawen jamapai unanti xau mexte númeroya putanankanwen, ¿tsuki taxnimenkainan?— iwanan, unanti putabu Jonás chakabukidana jaki taxniai jatu unanma 8jabun Jonás yukakin:

—¿Min jaskakidaxun niwe chakabu nuku anu bemaxumen? ¡Nuku yuiwe! ¿Min jawa daya jaya kai ikai? ¿Jania min juamen? ¿Min maedan, jadatumen? ¿Min tsua nawamen?— akabu

9Jonásin jatu kemakin yuikin:

—En Hebreo nawaki. Nai anu jiwea Dios Jehováan ianenwan ewapa inun mai jidabi dami wanitun ea tsumawani dayaxunkin en kenwanmiski. 10-11 Ea jaska wabiani jawen yunua axuanma Jehová anua en paxai ikaii— jatu wa jawen jancha ninkaibun janua ianenwan ana tunkax tunkax ichakayamaya uin datechakayamakin Jonás yukakin:

—¿Jaskai jawen yunua chibanma min nuku jaska wamai ikai? ¿Ianenwan jau mainun nun mia jaska watidumen?— akabu

12Jonásin jatu kemakin yuikin:

—Ianenwan medan man ea pukuaya ibubis mainkiki. En chakabuwen taea matu anu niwe bidenepa bexu en unanjaidaii— jatu wa

13jawen jancha ninkama main xaxu keti anun, iwanan, jaimanwen tuen chakayamabiabu ianenwan ana tunkax tunkax ichakayamaiwen taea jawa keti atidubuma 14januxun jabun Jehová yuka chakayamakin yuikin:

—Jehováan, ja junin chakabuwen taexun nun jasayamanun nuku tenanyamawe. Ja juni jawa chakabu jayamaken Jehováan, jaska min akatsis ikai min akubainmiswen taexun ja juni jasai mawaken nuku kupiyamaxanwen—

15atan ianenwan anu Jonás putaibun samama ianenwan bechuduni maianyan 16uintan xaxu bunikabu Jehováki datejaidakin jawen daewati inankuin inantan jaskai pe jiweti Jehová yubaibun

17jakimamadi Jonás bakawan itamamajaida Jehováan dami wani yunua juxun Jonás xeashina xaba dabe inun bestitian inun meshu dabe inun bestitian kaya Jonás dakaxun

Bakawan jatu anuxun Jonásin Jehová yukanikiaki, na janchadan

2 1Jonás bakawan jatu uke medanxun Jehová kenwankin 2yuikin:

“Jehováan, bika tenejaidakin en mia yuka min ea kemaxuki.

Ianenwan ewapa uke medan mawa keska dakaxun mia yukakin: ‘¡Ea medabewawe!’ iki en mibe janchai min ea ninkaxuki.

- 3 Ianenwan nuajaida anu ea pukuabu
jene kushibainkin ea dabe dabe abainkin
jene buspu tsaubainai min yunua
ea nuntan nuntan abainshinaki.
- 4 Mia bebunxun ea putabu
kakin en kanebidanshina ibubis en unanshinaki.
Miki nukuti jiwe medibi en ana uintiduma dabanen en
shinanshinaki.
- 5 Ma en jene medan ka ea achi keyuxun
ianenwan nuajaida medan ea bepuaya
ianenwan medan basi jawen tapun nishi keskawen
en buxka ea yabushinaki.
- 6 Ianenwan nuajaida medan tsumabain ma jadi ea bichia
ana jadia en kaintiduma dabanen en ishianki.
Jakia Jehováan, miadan, min en Mekenika Dioski.
En mawabiapanan min ea ana jiwemakin piskumashinaki,
bakawan medan nanetan ea mekekinan.
- 7 En yushin ea anua kainkainaya unankin
Jehováan, mia shinankin en mia yuka min Templo medibi anu
mianu en jancha taxnishinaki.
- 8 Tsuabunda yushibu dami kenwankubainkin
mia chibainkin jenebainmisbuki.
- 9 Jakia eanan, en juiwen benimakin mia kenwainkin
Jerusalén anuxun inabu xeni kuakin en mia menuxunkubainxanaii.
Jawada en mia yubaima ana jakimama mia axunkin en mia
menexunxanaii.
Jehováan, jiwemakin mian besti junibu min piskumatiduki”, ikaya

10 Jehováan jawen jancha bechipaikin jau mashi anua bakawan Jonás
janantanun Jehováan yunua mashi kexa ka bakawan jananiaki.

**Nínive anu jiweabun Jehováan kupiti ninkatan jatun
shinan betsa wanibukiaki, na janchadan**

3 1 Jehováan Jonás ana nichinkin yuikin: 2 “Nenua benikaini Asiria
nawabun maewan ewapajaida Nínive anu kaxun jaska en mia yuiaia
jadixun jatu banabimatanwen”, aka

3-4 jaska Jehováan yunua ninkatan kainkaini Nínive maewan ewapajaida
xaba dabe inun besti main kai kapukekaintibiaken Jonás ja maewan
anu jikitan xaba bestichai maewan kapukekin jui kushipawen jatu
yuikubainkin: “40 xaba keyudiana matuki sinatakin Dios kushipajaida
dasibi jatu binuatun Nínive maewan yamawakin keyuxanikiki”, jatu
wakubainai

⁵ja maewan anu jiweabun ninkatan jaska Dioskidi Jonásin jatu yuiái ikunwankin: “Samakenankanwen”, iki yubakatan xanen ibubu inun, xanen ibu bexmasbu inun, nuitapajaidaibun jawen nui bika teneai unanmati tadi bexa sawe keyuabun ⁶jaska Jonásin jatu banabimai Nínive xanen ibujaidatun ninkadiatan jawen xanen ibu tsauti anua butukidan jawen xanen ibun tadi jawendua pekatan jawen nui bika tenei unanmati tadi bexa sawediatan chi mapuki tsaua ⁷jawen medabewanikabube janchatan jau eska yunuti bena waxununbun jatu yuikin: “Piti inun nuxuti yudabu dasibibun jau piyamanunbunwen. Ja dikabi jatun ina awa inun jatun chaxuwan piti inun unpax jau jatu amayamadianunbunwen. ⁸Ana jaska tibi ikama man shinan chakakin jaska chakabu tibi man amis inun man detenamei jeneama man ikunkainai natian jenetan nui bika teneai unanmati tadi bexa sawe keyutan jau nukuwen nuinun Dios kushipajaida dasibi jatu binua jui kushipawen yukakubainkanwen. ⁹Nun jaska wakubainaya nukun chakabuwen nukuki sinatabiashina Diosun jawen shinan betsa waxanimenkain. Jaska waya nun mawama ixanaii”, jatu wa buxun mae jidabi anu jatu yuikubaunaibun

¹⁰Nínive anu jiweabu jaska wakubaini jatun chakabu ma jeneabun Diosun uintan jawen kupiti Jonásin jatu banabimashina Diosun shinan betsa watan kupiti jatu anu ana yunuamaken

Jonás Dioski sinatanikiaki, na janchadan

4 ¹Nínive anu jiweabu Diosun jatu kupiamawen taea Jonásin jaska bechipaiama Dioski sinatajaidakin ²jabe janchakin yuikin:

—Uian. Jehováan, en mae anu eki nukuxun Nínive anu min ea yunua jatuwen nuikin min jatu kupiama ixanaiwen taea eska shinain en jawaida Tarsis anu paxai en junekainkatsis ikimaki. Mia min mekenan Dios pepa tsuabuda jatuwen dabanán ikin min jawaida sinataisma kupikatsi jatu banabimabiatan tsuabudawen nuijaidakin min shinan min betsa watidu min ea uinmai. ³Jaskawen taexun Jehováan, ea tenanwen, iwanan, en mia yukaii. Jaskadan, peki, en mawadan, en ana jiweyamanunan— aka ⁴jakia Jehován kemakin yukakin:

—Min sinatai jaska janchaidan, ¿jaska peken min iki ikai?— aka

⁵janua ja maewan anua Jonás kainkaini badi juaikidi ka januxun ja maewan jaska waimenkain, ixun januxun uinkatsi ji punyan mextexun utati watan ja naman tsauken ⁶badin jau kuayamanun jexe betsa daka Jehová Diosun jawaida yume waxunkin nishi benematan Jonásin buxka mamaki junekin utawa, jaska waxuna Jonás jawen benimaya ⁷ana penaya xena betsa Diosun yunua juxun nishi ewakin utawashina jawen taxu tasenbaunkin keyua xanatan nidi ikatsi utsia dakaken ⁸badi mapekeaya badi juaikidia niwe xanabidi ikai Diosun xunku imabidana jawen buxka badin kuajaida Jonás unanyamasi mawakatsis ikin yuikin:

—Jaskadan, peki, en mawadan, en ana jiweyamanunan— ikaya
 9jakia Diosun kemakin yukakin:

—Nishi ewashina ikis ma xanaxuwen taea min sinatakunkainaidan,
 ¿jaska min shinainan, pemen?— aka
 kemakin Jonásin yuikin:

—¡Jawaikika, ean en shinanan, peki! ¡Jakia sinatayabi en
 mawaii!— aka

¹⁰januxun Jehován Jonás xabakabi yuikin:

—Mian nishi min banamaki. Min ewawamadiki. Meshu bestichai
 jukuin xaba bestichai ewatan ana meshu betsatian mawai utsixuki.
 Jaskabiaya ja nishiwen min nuijaidaii. ¹¹Jamen eadan, eskawen en
 nuiiai. 120,000 yuda jiweabu jawen meken yusiudi inun jawen meken
 yusmaudi jadatuda jawa unandiabuma inun inabu midimajaida jayawen
 taexun mia binui ja maewan ewapajaida Nínive anu jiweabuwen eadi en
 nuijaidakunikainaii— anikiaki, Diosunan.